



## O Volapükaf lens valöpo!

Tefü nüm büik gaseda obsik egetob penedis nitedik anik de reidans küpälik e nolaliegiks. Balan reidanas et enunon, das tefü ‚Isopoda‘ vöd: leigalögaf < binonöv gudikum ka el „leiga<sup>z</sup> futaf“. Liedo püks mödik no leadons distidön kuratiko suemo<sup>z</sup> dis: fut, lög, sekü kelos pöls sümik binons mögiks. Läbo nima<sup>z</sup> nem votik (bambudaber, sevabo el ‚Ailuropoda melanoleuca‘) no kodon taspikis anik.

Votikan emobon sotüli sököl strofa balid in lid fa el Tsoi:

*Nif vietik e glad gedik tegons taledi kräköfik.*

*Äsva teged flabik su on zif topon ön snal vegik.*

Kedets at jinons lü ob binön nitediks, te boso dotob dö geb präpoda: ön (kel ba malon is, das subsat: snal < pagebon ko siäm metaforik).

Ün gustul ereidob bevüresodo telspikoti nitedik dö gebäd stipabidira in Volapük. Bo onotükob bespiki at medü „Vög Volapüka“, e büfo vilob bükön eli ‚meme‘ tefü yegäd at (logol<sup>z</sup> sös padi: 83!). If ‚Arie de Jong‘ ebepenomöv jü in pats sma<sup>z</sup> likün sinifis värbafoamas, nu Volapükans no labonsöv säkädis mödik. Vilom oles ai benoplöpo bemastikön säkädis at reda<sup>z</sup> kan:

*Daniil Morozov*

## **VÖD SOFÄLIK BINON PLITÖFIK IGO PRO BELAGIAN.**

*Mär fa ,Evgeny A. Khvalkov'. Dil finik.*

Belagian äbaiodom ad stebedön, e ,Mirisleyf', kel ämemom, kisi jimatan ispihof ome tefü klänabadöf belagianas, primo ävilom demü je nets mögik valik fimatanön omi dulöfiko len bim, dat no öfugom-la, ab poso äletikom ed äsagom sökölösi:

„O cädasöl: belagian! valans spikons dö klänabadöf pöpatribüta orik, ab ob cedob, das kanoy konfidön ori e das no ofugor nekomü ob, ibä or binor söl ön tefs valik stümabik, ed ejutedor sui ob pö belalove veg ön däsper, te bio jenöfo mon äfabinon lä or. Ga kanob konfidön ori, vo-li?”

Belagian so äfälikom, das igo ädrenom bosilo. No so suvo belagian labom mögodi ad lilön vödis so gudälöfikis dö ok it!

„Ostebedob ori us, o cädasöl: ,Mirisleyf'!” äsagom. „Kanor lölöfiko lekonfidön obi!”

,Mirisleyf' so äkömom lü domil yaganik okik, ed ekö! stäg: ,Findabayr' ön glif ästanon len yan ed äleadon falön drenis, so gretikis, äs pärlats.

„Kis ejenon-li? o ,Findabayr' gudaladälik!” hiyunan säkom. „Kikodo drenol-li so ledoliko?”

„Jisiöri obik ä jimatani olik dünans regik efanons, o hisiör gudälik obik! Reg ävilom koedön dulterön ofi, e ven no eyilidof, ebüedom je dön ofi ini lefanäböp stonik. Äbinosöv gudikum, das ädrefolöv obi me sagit ün del ut, kü ikolkömol ofi; pö jenet at pu no älifoböv, jüs del legli fik at ekömon, ven jisiör: ,Layfo' < guirof in fanäböp, e leno kanob yufön ofi me bos!”

„O midunan kiom!” ,Mirisleyf' ävokädom. „Yulob, das osäfanäbö pob ofi, e reg popönom lölöfiko demü atos!”

E kurayagan ägekömom lü mänsidatop fotasiema, älävokom belagiani ed äbüedom golön omi po ok ini regakased. Du ,Mirisleyf' ädugom belagiani da zif, zifans äklänedons okis ini doms oksik e te prüdiko äsesteigons okis se fenäts ad küpedön süfüli nensamik: no

## X:83:2022

aldelo kanoy logön, vio ve süts dugoy belagiani lifik! Ven hiyunan äkömom lü leyan lefanäböpa, kö ‚Layfo‘ pifanäböpof, äbüdom belagiane ad breikön vărulis vetik, sevabo ad dunön utosi, kelos äbinon pö belagian smalot leigoso fasilik, äsä pö ols binosöv fasilik ad feifön gebölo doatis tel. Fotaneüf nu äbinof libik, zuo dönu kobü himatan pälelöföf oba, e reg bapälik, ilogölo eli ‚Mirisleyf‘ ön stad lifik ä nen= viodik, zuo sogü belagian, äjutedom ad rönön, leadölo falön kroni okik sekü vifäl, äbunom ini fonäd ad klänedön oki de belagian, ed in top ebo et änoyom deadio.

Jiel Layfo goldakölaherik älösumof kroni ed äseitof oni sui ‚Mirisleyf‘ okik, ed etans kobo älifons ed äreigons lunüpo e läbo. E kis ätefon-li belagiani? Äleadoy mogolön belagiani lü belem di ‚Trodkharm‘, posä ikoedoy promön omi, das no plu seimüpo öfidom tävanis beigolöl, ed öyagom te nimis, zu atos te no spikölis. E bai sev obas äföлом promi at, zuo tevanes dranädikün utanas, kels äkripons ini kev omik ad logön omi, igo äkonom märi at — so iceinons omi vöds sofälik e konfid, keli hiyunan ijonüлом ome!

Sis tim ebo et mens sagons: „Vöd sofälik binon plitöfik igo pro belagian”.



FIN.



## VÄRBAFOM SPÄKIK (magod: ‚meme’).



## REIN NENFINIK.

Fa ‚Frank Roger‘ (tiäd rigik: ‚The Endless Rain‘). Tradutod fa ‚Hermann Philipps‘.

**H**iel Bruce äsäuimükom logodi oka me sliv, ed äsleifom pödio stuli. „Rein maleditik kion!” ävögom ed ägevom oke fümü, das no plu in rein äseadom. Äflekomi oki lü flen oka, kel äseadom nai om, ed äsäkom: „Kilunüpo ya reinos-li?”

„Sis lunüp”, flen omik: el Nick < ägespikom.

„Jinos lü ob, das reinos valüpo”, el Bruce ämurom. „E no cedob, das rein ostopedon seimüpo.”

„No neodobs stomanunodi”, el Nick äsagom siölo.

Dü tim anik mens bofik äseadoms nai od seiliko, ed älelogoms reini donio laifalöli. Töbo seimikos ädabinon, kelosi äkanoms dunön.

„Fefo”, el Bruce äsagom seili finükölo. „Kitimo äbinos-li naed lätik, das no äreinos?”

„No memob otosi”, el Nick ägespikom. „Ab atos ba plänon mödikumosi dö memäl oba ka dö stom.” Äsplodülom me lusmil, kel äfinikon me kög vemik.

„If so olaireinos, olabobs säkädis vemik seimna”, el Bruce älaisagom.

„Ai plonol”, el Nick äsagom. Ädunom jästi züo jonölo, ed äläsagom: „Stebedolöd ad tikädön utosi, kelos binon gudik dö atos.”

„No küpob seimikosi gudik”, äbruvom, äjonon lü vat doniofalöl, äsua flen oka no äsevedom reini laidik.

„Luveratiko no onelabobs drinavati”, el Nick äplänom.

„Ö! No löliko negidetol”, el Bruce äsiom. „Ab too!”

„Ab too-li? Kisi vilol-li sagön me atos?”

„So no okanos laiijenön, o ‚Nick’! Atos klülön pro alan.” Äsäuimükom dönu logodi oka, bi vienasplodüls süpik imofon reini ebo ini lüod oma.

El Nick ätovülom jotis. „Snatiko mutob sagön, o ‚Bruce’! das no sue-mob disti pakodöl reina boso mödikuma. Zilogolöd! Tikädolöd obis in plad at! Lindifos, if olaireinos.”

El Bruce älöädöm de stul ed äsagom: „Golob ninio. Leno sufädob reini at. Leluimikob.”

„Kiöpio golol-li?”

## X:85:2022

„Ini kayüt oba”, el Bruce ägespikom.

„Kayüt-li? Nos binon us, keli kanol dunön, pläs seitol oli sui bed.”

El Bruce ästanom meditiko dü timil. Klüluko el Nick ägitedom. Kayüts domabota äbinons lucems smalik e mu nabiks, osi notodölo sofäliko. Dido ökanom dunön nemödikosi us, ab pu ögevon ome jeli ta rein nenfinik.

Äzogom tefü utos, kelosi ödunom. Älogedom foi ok lü vataplen gedik, leigöfik, kel ätenikon ini lüods valik so fagio, äsä äkanom logön.

„Bo seimikos no ereton pö obs”, ätisagom. „Mels geiliköl, län pätu vatöl, domabots pöfädik, su kels steifobs töbiko ad lovelifädön, e rein nenfinik.”

„Ab ga nog lifobs”, el Nick äküpetom. „Betikolöd valanis ut, kels päridikons.”

„Klülö gidetol”, äsiom, du äkluinom dönu logodi oka nen benosek, bi sliv oka leigo äluimon. „Too ogolob ninio: te dü timil brefik.”

„Benö!”, el Nick äsagom. „Ovokob oli, ven rein ufinikon-la”, me smil äsplodülon, ab täno tio äteafom dub kögaglepäd.

„Cedob, das luim kodon töbi ole”, el Bruce äkofom, ed äsoalükom oki ini kayüt oka. ■

### **VÖDS ANIK IN VÖDEM LÖPIK PEGEBÖLS.**

säluimükön = ,to wipe dry’

drinavat = ,drinking water’

domabot = ,house boat’

stomanunod = ,weather forecast’

leluimikön = ,to get soaked’

vataplen = ,expanse of water’

---

## **PLIN SMALIK.**

### **Kapit: 25.**

„Mens”, plin smalik äsagom, „dränons okis ini vifatrens, ab no plu sevons utosi, kelosi sukons. Kludo vegons usio ed isio ai züo mufölo.”

Ed älüükom:


„Ed atos no digädon töbidami...”

Fonäd, keli irivobs, no äsümon ad fonäds Saharänik. Fonäds Saharänik binons hogs balugik in sab peseböls. Fonäd et ga äsümedon ut vilaga. Ab us vilag nonik ädabinon, ed äjinos lü ob, das ädrimob-la. ➔

## X:86:2022

„Binos bisarik”, äsagob pline smalik, „das valikos blümon: ginöm, böket e jain...”

Äsmilom, äkontagom jaini, ed äkoedom jäfidön ginömi. E ginöm äkniron äs vienijonian bäldik, ven lunüpo vien no idabinon.



„Lilolös!” plin smalik äsagom, „egalükobs fonädi at, e kaniton...”

No ävilob, das ätöbi-dom:

„Leadolös bejäfön obe atosi!” äsagob ome, „binos tu vetik pro ol.”

Nevifiko äginotovob böketi jüi fonädasiem. Us äfi-mükob sefiko böketi. In lils obik kanit ginöma äbleibon tonön, ed äloegob dremön soli in vat nog ähulöl.

„Soafob e vilob drinön vati at”, plin smalik äsagom, „givolös obe atosi ad drinön!...”

Ed äsue mob utosi, kelosi isukom!

Älökob böketi jü lips omik. Ädrinom ko logs färmik. Äbinos so plitik, äsä pö zälafided. Vat at ädiston de nulüdot kösömik. Idavedon se gol dis stels, se kanitam ginöma, se töbidam bradas obik. Äbinon so plitik pro lan, äs legivot. Ven äbinob hipul smalik, litam kritidabima, musig mäsäda zeneitik, löfül smililas so äjafedons nidi lölik kritidalegivotu ut, keli igetob.

„Mens su planet olik”, plin smalik äsagom, „lebridons rosadis lulmil in gad ot... ed us no tuvons utosi, kelosi sukons...”

„No tuvons utosi, kelosi sukons...” ägespikob.

„E too utosi, kelosi sukons, kanonöv patuvön in rosad te bal ud in bos vata...”

X:87:2022

„Fümö!“ ägespikob.

E plin smalik älüükom:

„Ab logs bleinons. Sötoy sukön me ladäl.“

Idrinob. Änatemob gudiko. Sab pö delaprim äbinon mielakölik. Köl at mielasümik id älabükon obi. Kikodo üfo äglifob-li?...

„Mutol fölön promi olik“, äsagom nelaodiko obe plin smalik, kel dönu iseidom oki nilü ob.

„Promi kinik-li?“

„Ya sevol osi... tefü musul pro jip obik... ga gididob demü flor at!“

Äsüramenob se pok obik skätis däsinoas. Plin smalik äküpom onis ed äsagom, smilölo:

„Els ,baobabs’ olik boso sümedons brasids...“

„Ag!“

Ob it büo kio äpleidob demü els ,baobabs’ et!

„Tefü renar olik... lils onik... boso sümedons hons... Binons tu luniks!“

E dönu äsmilom.

„Binol negidik, o smalanil! no eskilob ad däsinnön bosi pläämü els ,Boa’ nedulogamovik ed uts dulogamovik.“

„Benö! Id atos osaidon“, äsagom, „cils osuemons.“

Täno ädäsinob me stib musuli. Ed ägivölo oni ome, älabob senäli glümülik:

„Labol diseinis, dö kels sevob nosi...“

Ab no ägespikom obe. Äsagom obe:

„Sevolös! sis fal oba sui tal... odelo yel bal opasetikon...“

Fovo pos seil nog äsagom:

„Efalob vemo niliko de top isik...“

Ed äredikom.

E dönu — nes suemön kodi atosa — isenälob glifi bisarik. Too säk bal äsüikon pö ob:



X:88:2022

„Benö! täno no ebinos fädik, das bü dels jöl ün göd, kü ekosükob obi ko ol, espatol vero soaliko ön fagot mö liöls mil de topäds valik pebelödöl! Egekömol-li lü top fala olik?”

Plin smalik äredikom nogna.

Ed äläspikob, zogölo:

„Ba kodü yelamadel-li?...”

Plin smalik äredikom nogna. Neföro ebegespikom säki, ab ven redi=koy, atos sinifon: si! Vo-li?


„Ag!” äsagob ome, „dredob...”

Ab ägespikom obe:

„Anu mutol vobön. Mutol gegolön lü cin olik. Ostebedob oli is. Gekömolös isio osoaro!...”

Ab no ivedob takedikum. Ämemob renari. Mögos, das mutoy dre=nön boso, ven eleadoy teimön oki... *Fövot ofovon.*

**JENOTEM VOLAPÜKA FOMÜ MAGOD: „MEME”.** 😊👉



Gramatir  
vapüka



Glamat  
nomik



Gramat  
Volapüka.